

## თბილისის ჰუმანიტარული სასწავლო უნივერსიტეტის

### სტუდენტური თვითმმართველობის დებულება

#### თავი I

#### ზოგადი დებულებები

##### მუხლი 1.

1. თბილისის ჰუმანიტარული სასწავლო უნივერსიტეტის სტუდენტური თვითმმართველობა (შემდგომში სტუდენტური თვითმმართველობა) არის უნივერსიტეტის შემადგენლობაში არსებული სტუდენტთა წარმომადგენლობითი ორგანო, დამოუკიდებელი სტრუქტურული ერთეულებითა და მართვის ორგანოებით, რომელიც ახორციელებს უმაღლესი განათლების შესახებ საქართველოს კანონით, უნივერსიტეტის წესდებითა და წინამდებარე დებულებით გათვალისწინებულ უფლებამოსილებებს, როგორც უნივერსიტეტის შიგნით, ისე მის გარეთ.

2. სტუდენტური თვითმმართველობა არ წარმოადგენს იურიდიულ პირს.

##### მუხლი 2.

სტუდენტური თვითმმართველობა შედგება საყოველთაო, თანასწორი და პირდაპირი საარჩევნო უფლების საფუძველზე, ფარული კენჭისყრით, 2 წლის ვადით არჩეული 20 დელეგატისაგან.

##### მუხლი 3.

სტუდენტური თვითმმართველობა უფლებამოსილების განხორციელებისას დამოუკიდებელია და მის საქმიანობაში ჩარევა ან მასზე რაიმე სახის ზემოქმედების მოხდენა უნივერსიტეტის ადმინისტრაციის ან ნებისმიერი სხვა პირის მხრიდან დაუშვებელია, გარდა კანონით გათვალისწინებული შემთხვევებისა.

##### მუხლი 4.

სტუდენტური თვითმმართველობის ადგილსამყოფელია საქართველო, ქ. თბილისი (0144), ბერი გაბრიელ სალოსის გაზ. №31 თბილისის ჰუმანიტარული სასწავლო უნივერსიტეტი.

#### **მუხლი 5.**

სტუდენტურ თვითმმართველობას უნივერსიტეტის ადმინისტრაციასთან შეთანხმებით, აქვს საკუთარი ბეჭედი და დებულებით გათვალისწინებული სხვა ატრიბუტიკა.

#### **მუხლი 6.**

წინამდებარე დებულებაში გამოყენებულ ტერმინებს აქვთ შემდეგი მნიშვნელობა:

ა) სტუდენტი – პირი, რომელიც უმაღლესი განათლების შესახებ კანონით და უმაღლესი საგანმანათლებლო დაწესებულების წესდებით განსაზღვრული წესით ჩაირიცხა და სწავლობს უნივერსიტეტში ბაკალავრიატის, მაგისტრატურის ან დიპლომირებული სპეციალისტის, ასევე დოქტორანტურის პროგრამის გასავლელად;

ბ) სტუდენტური თვითმმართველობა - თბილისის ჰუმანიტარული უნივერსიტეტის სტუდენტების წარმომადგენლობითი ორგანო;

გ) უნივერსიტეტის ადმინისტრაცია - თბილისის ჰუმანიტარული უნივერსიტეტის ყველა რგოლის მმართველობითი ორგანო, რომელიც ახორციელებს უნივერსიტეტის მართვას, ადმინისტრირებას და სასწავლო პროცესს;

დ) ფაკულტეტი - უნივერსიტეტის ძირითადი სასწავლო-სამეცნიერო და ადმინისტრაციული ერთეული, რომელიც უზრუნველყოფს სტუდენტთა მომზადებას ერთ ან რამდენიმე სპეციალობაში და მათთვის შესაბამისი აკადემიური ხარისხის მინიჭებას;

ე) ფაკულტეტის საბჭო – უნივერსიტეტის ფაკულტეტის წარმომადგენლობითი ორგანო;

ვ) დელეგატი - სტუდენტური თვითმმართველობის არჩევნებში გამარჯვებული კანდიდატი.

## სტუდენტური თვითმმართველობის მიზნები და უფლება-მოვალეობები

### მუხლი 7.

სტუდენტური თვითმმართველობის მიზნებია:

- ა) თავისი უფლებამოსილების ფარგლებში, დაიცვას და წარმოადგინოს სტუდენტების უფლებები და კანონიერი ინტერესები როგორც უნივერსიტეტში, ისე მის ფარგლებს გარეთ;
- ბ) თავისი უფლებამოსილების ფარგლებში, ხელი შეუწყოს სტუდენტებს უფლებებისა და თავისუფლებების პრაქტიკულ რეალიზაციაში;
- გ) დაეხმაროს სტუდენტებს მაღალკვალიფიციური განათლების მიღებაში, თვითრეალიზებასა და დამოუკიდებელი აზროვნების ჩამოყალიბებაში;
- დ) დახმარება გაუწიოს სტუდენტებს სწავლის პერიოდში, პროფესიული უნარ-ჩვევებისა და კონკურენტუნარიან პროფესიონალად ჩამოყალიბებაში;
- ე) ხელი შეუწყოს უნივერსიტეტის ინტეგრაციას ევროპულ საგანმანათლებლო სივრცეში და მაქსიმალურად უზრუნველყოს ამ პროცესში სტუდენტთა მონაწილეობა;
- ვ) ხელი შეუწყოს სტუდენტებში სამართლებრივი თვითშეგნების დონისა და კანონისადმი პატივისცემის ამაღლებას, დახმარება გაუწიოს საქართველოში დემოკრატიული ღირებულებების დამკვიდრებას და სამოქალაქო საზოგადოების ჩამოყალიბებას;
- ზ) შექმნას ოპტიმალური პირობები სტუდენტთა დასვენების, შრომითი მოღვაწეობის ან სხვა მოთხოვნილებების დასაკმაყოფილებლად გამრავალფეროვნოს სტუდენტური ცხოვრება.

### მუხლი 8

სტუდენტური თვითმმართველობა თავის უფლებამოსილების ფარგლებში:

- ა) იცავს და წარმოადგენს უნივერსიტეტის სტუდენტთა უფლებებსა და კანონიერ ინტერესებს;
- ბ) უზრუნველყოფს უნივერსიტეტის სტუდენტთა უფლებებისა და კანონიერი ინტერესების განხორციელებას;
- გ) უნივერსიტეტის ადმინისტრაციასთან თანასწორუფლებიანი თანამშრომლობის საფუძველზე წყვეტს სასწავლო პროცესთან და მატერიალურ მხარესთან დაკავშირებულ საკითხებს;

დ) შეიმუშავებს წინადადებებს ფაკულტეტის ან უმაღლესი საგანმანათლებლო დაწესებულების მართვის სისტემისა და სწავლების ხარისხის გასაუმჯობესებლად, რომელთაც წარუდგენს ფაკულტეტის საბჭოს, წარმომადგენლობით საბჭოს ან/და აკადემიურ საბჭოს;

დ) პერიოდულად ახდენს უნივერსიტეტის აკადემიური პერსონალის მუშაობის შეფასებას და შედეგებს წარუდგენს ფაკულტეტის საბჭოსა ან/და წარმომადგენლობით საბჭოს;

ე) გეგმავს, ორგანიზებას უწევს და ახორციელებს სტუდენტთა დასვენების, შრომითი მოღვაწეობისა და სხვა მოთხოვნილებების დასაკმაყოფილებლად შეხვედრებს, დებატებს, დისკუსიებს, ტრენინგებს, ინტელექტუალურ თამაშებს, საგანმანათლებლო-სამეცნიერო, კულტურულ, სპორტულ, გასართობ და კანონით ნებადართულ სხვა სახის ღონისძიებებს;

ვ) უზრუნველყოფს უნივერსიტეტის სტუდენტების აქტიურ მონაწილეობას სახელმწიფოს ინტერესების განხორციელების პროცესში;

ზ) თანამშრომლობს სხვა საუნივერსიტეტო, სამთავრობო და არასამთავრობო, სახელმწიფო და საერთაშორისო ორგანიზაციებთან, აგრევე გაერთიანებებთან;

თ) სტუდენტური თვითმმართველობის მიზნების მისაღწევად ახორციელებს უმაღლესი განათლების შესახებ საქართველოს კანონით, უნივერსიტეტის წესდებითა და ამ დებულებით გაუთვალისწინებელ სხვა უფლებამოსილებებს.

## **მუხლი 9.**

სტუდენტური თვითმმართველობის დაფინანსების წყაროებია:

ა) უნივერსიტეტის ბიუჯეტი და სპეც-სახსრებიდან მიღებული შემოსავალი;

ბ) ნებაყოფლობითი შემოწირულობები;

გ) მესამე პირის მიერ გადმოცემული ქონება, რომლის მართვაც ხორციელდება უნივერსიტეტის ადმინისტრაციასთან შეთანხმებით;

დ) სხვა კანონით ნებადართული შემოსავლები.

## **თავი III**

### **სტუდენტური თვითმმართველობის დელეგატი**

## **მუხლი 10.**

1. სტუდენტური თვითმმართველობის დელეგატი არის სტუდენტურ თვითმმართველობაში არჩეული სტუდენტი.
2. სტუდენტური თვითმმართველობის დელეგატი არის თავისი ფაკულტეტის წარმომადგენელი, რომელიც თავის უფლებამოსილებას ახორციელებს პირადად და მისი გაწვევა დაუშვებელია.
3. სტუდენტური თვითმმართველობის დელეგატად შეიძლება არჩეულ იქნეს მხოლოდ უნივერსიტეტის სტუდენტი, რომელიც იმავდროულად არ იკავებს უნივერსიტეტში რაიმე ადმინისტრაციულ თანამდებობას.

## **მუხლი 11.**

სტუდენტური თვითმმართველობის დელეგატის უფლებამოსილების ვადა განისაზღვრება 2 (ორი) წლით.

## **მუხლი 12.**

1. სტუდენტური თვითმმართველობის დელეგატის უფლებამოსილება იწყება მისი არჩევის მომენტიდან და მთავრდება ახალარჩეული დელეგატების პირველი შეკრებისთანავე.
2. სტუდენტური თვითმმართველობის დელეგატის უფლებამოსილების ვადამდე ადრე შეწყვეტის საფუძველია:
  - ა) პირადი განცხადება;
  - ბ) უნივერსიტეტში ადმინისტრაციული თანამდებობის დაკავება;
  - გ) სტუდენტის სტატუსი შეჩერება/შეწყვეტა;
  - დ) უნივერსიტეტის წესდების ან სტუდენტური თვითმმართველობის დებულებით გათვალისწინებული წესების დარღვევა;
  - ე) არასაპატიო მიზეზით, სტუდენტური თვითმმართველობის საქმიანობაში ზედიზედ ორი თვის განმავლობაში მონაწილეობის მიუღებლობა;
  - ვ) სასამართლოს მიერ ქმედუუნაროდ, უგზოუკვლოდ დაკარგულად ან გარდაცვლილად გამოცხადება;
  - ზ) გარდაცვალება.

### **მუხლი 13.**

დელეგატის უფლებამოსილების ვადამდე შეწყვეტის შემთხვევაში, მის ადგილს იკავებს სხვა წარმომადგენელი, რომელმაც ვერ დააგროვა ხმათა საკმარისი ოდენობა.

### **მუხლი 14.**

1. სტუდენტური თვითმმართველობის დელეგატი უფლებამოსილია:

ა) მონაწილეობა მიიღოს სტუდენტური თვითმმართველობის მართვის ორგანოების მუშობაში;

ბ) იქონიოს სათათბირო ხმის უფლება;

გ) აირჩიოს და თავად იყოს არჩეული სტუდენტური თვითმმართველობის მართვის ორგანოებში;

დ) დაიკავოს სტუდენტურ თვითმმართველობაში ნებისმიერი თანამდებობა;

ე) დებულებით განსაზღვრული მიზნების განსახორციელებლად წინადადებებით მიმართოს სტუდენტური თვითმმართველობის მართვის ორგანოებს;

ვ) მიიღოს მონაწილეობა სტუდენტური თვითმმართველობის მიერ ორგანიზებულ ღონისძიებებში ან თავად შეიმუშავოს და განახორციელოს ისინი;

ზ) მიიღოს ყოველგვარი ინფორმაცია სტუდენტური თვითმმართველობის ორგანოებიდან მათი საქმიანობის შესახებ;

თ) განახორციელოს საქართველოს მოქმედი კანონმდებლობითა და ამ დებულებით გათვალისწინებული სხვა უფლებამოსილებანი.

2. სტუდენტური თვითმმართველობის დელეგატი ვალდებულია:

ა) შეასრულოს სტუდენტური თვითმმართველობის დებულებით მასზე გათვალისწინებული ვალდებულებები;

ბ) დაიცვას უნივერსიტეტისა და სტუდენტური თვითმმართველობის სახელი, ავტორიტეტი და ქონება;

გ) ხელი შეუწყოს სტუდენტსა და უნივერსიტეტის მართვის ორგანოებს შორის ჯანსაღი ურთიერთობების ჩამოყალიბებას;

დ) მიიღოს მონაწილეობა სტუდენტური თვითმმართველობის საქმიანობაში;

ე) დაესწროს სტუდენტური თვითმმართველობის საერთო კრების სხდომებს.

## **მუხლი 15.**

1. სტუდენტურ თვითმმართველობას შეიძლება ჰყავდეს საპატიო წევრები, რომელთა რაოდენობაც არ უნდა აღემატებოდეს ხუთ წევრს. მათ არ გააჩნიათ სათათბირო ხმის უფლება.
2. საპატიო წევრის წოდებას ანიჭებს სტუდენტური თვითმმართველობის პრეზიდენტი.

## **თავი IV**

### **სტუდენტური თვითმმართველობის სტრუქტურა**

## **მუხლი 16.**

სტუდენტური თვითმმართველობის მართვის ორგანოებია:

- ა) სტუდენტური თვითმმართველობის საერთო კრება;
- ბ) სტუდენტური თვითმმართველობის პრეზიდენტი;
- გ) სტუდენტური თვითმმართველობის სამსახურები;
- დ) სარევიზიო კომისია;

## **მუხლი 17.**

1. სტუდენტური თვითმმართველობის საერთო კრება სტუდენტური თვითმმართველობის წარმომადგენლობითი ორგანოა.
2. სტუდენტური თვითმმართველობის პრეზიდენტი სტუდენტური თვითმმართველობის აღმასრულებელი ორგანოა.

## **თავი V**

### **სტუდენტური თვითმმართველობის საერთო კრება**

## **მუხლი 18.**

სტუდენტური თვითმმართველობის საერთო კრება წარმოადგენს სტუდენტური თვითმმართველობის მმართველობის უმაღლეს ორგანოს, რომელიც შედგება სტუდენტურ თვითმმართველობაში არჩეული ყველა დელეგატისაგან.

#### **მუხლი 19.**

1. სტუდენტური თვითმმართველობის საერთო კრება იკრიბება წელიწადში არანაკლებ ორჯერ მაინც.
2. სტუდენტური თვითმმართველობის საერთო კრების მოწვევის თარიღს განსაზღვრავს და შესაბამის დღის წესრიგს ადგენს სტუდენტური თვითმმართველობის პრეზიდენტი ვიცე-პრეზიდენტთან შეთანხმებით.
3. სტუდენტური თვითმმართველობის საერთო კრების ჩატარების თარიღისა და შესაბამისი დღის წესრიგის შესახებ სტუდენტური თვითმმართველობის დელეგატებს ეცნობება საერთო კრების ჩატარებამდე არაუგვიანეს ორი დღისა.

#### **მუხლი 20.**

სტუდენტურ თვითმმართველობის საერთო კრების რიგგარეშე სხდომას მოიწვევს:

- ა) სტუდენტური თვითმმართველობის პრეზიდენტი საკუთარი ინიციატივით;
- ბ) სტუდენტური თვითმმართველობის პრეზიდენტი დელეგატების არანაკლებ 1/4-ის მოთხოვნით;

#### **მუხლი 21.**

1. სტუდენტური თვითმმართველობის საერთო კრება უფლებამოსილია, თუ მას ესწრება საერთო კრების სრული შემადგენლობის ნახევარზე მეტი.
2. სტუდენტური თვითმმართველობის საერთო კრების სხდომებს თავმჯდომარეობს სტუდენტური თვითმმართველობის პრეზიდენტი.

#### **მუხლი 22.**

სტუდენტური თვითმმართველობის საერთო კრება:



ა) სრული შემადგენლობის 2/3-ის უმრავლესობით იღებს სტუდენტური თვითმმართველობის დებულებას, ამავე უმრავლესობით შეაქვს მასში ცვლილებები და დამატებები;

ბ) სრული შემადგენლობის უმრავლესობით ირჩევს სტუდენტური თვითმმართველობის პრეზიდენტს;

გ) ამტკიცებს სტუდენტური თვითმმართველობის პრეზიდენტის მიერ წარმოდგენილ სტუდენტური თვითმმართველობის ბიუჯეტს;

დ) სტუდენტური თვითმმართველობის პრეზიდენტის წარდგინებით, დამსწრეთა შემადგენლობის უმრავლესობით ამტკიცებს სტუდენტური თვითმმართველობის ვიცე-პრეზიდენტს;

ე) სტუდენტური თვითმმართველობის პრეზიდენტის წარდგინებით, დამსწრეთა შემადგენლობის უმრავლესობით ამტკიცებს სტუდენტური თვითმმართველობის სარევიზიო კომისიის თავმჯდომარეს;

ვ) ამ დებულებით გათვალისწინებულ შემთხვევებში წყვეტს სტუდენტური თვითმმართველობის პრეზიდენტის იმპიჩმენტის საკითხს;

ზ) თავის კომპეტენციას მიკუთვნებულ საკითხებთან დაკავშირებით დამსწრეთა შემადგენლობის უმრავლესობით მიიღოს დადგენილებები, რომლებსაც ხელს აწერს სტუდენტური თვითმმართველობის პრეზიდენტი ან ვიცე-პრეზიდენტი.

თ) ახორციელებს სტუდენტური თვითმმართველობის მიზნების მისაღწევად `უმაღლესი განათლების~ შესახებ საქართველოს კანონით, უნივერსიტეტის წესდებითა და ამ დებულებით გათვალისწინებულ სხვა უფლებამოსილებებს, რომლებიც არ ეწინააღმდეგება საქართველოს მოქმედ კანონმდებლობას.

## თავი VI

### სტუდენტური თვითმმართველობის პრეზიდენტი

#### მუხლი 23.

სტუდენტური თვითმმართველობის პრეზიდენტი არის სტუდენტური თვითმმართველობის უმაღლესი თანამდებობის პირი, რომელიც უძღვება საერთო კრების სხდომებს და წარმოადგენს სტუდენტურ თვითმმართველობას მესამე პირებთან ურთიერთობებში.

#### მუხლი 24.

1. სტუდენტური თვითმმართველობის პრეზიდენტი აირჩევა საერთო კრების მიერ 2 (ორი) წლის ვადით სრული შემადგენლობის უმრავლესობით, ფარული კენჭისყრის საფუძველზე.

2. სტუდენტური თვითმმართველობის პრეზიდენტის კანდიდატურის დაყენების უფლება აქვს სტუდენტური თვითმმართველობის დელეგატების არანაკლებ 1/3-ს.

#### **მუხლი 25.**

1. იმ შემთხვევაში, თუ ვერცერთმა კანდიდატმა ვერ დააგროვა არჩევისთვის ხმათა საკმარისი რაოდენობა, იმავე დღეს ინიშნება მეორე ტური, რომელშიც კენჭი ეყრება ორ საუკეთესო შედეგების მქონე კანდიდატს.

2. იმ შემთხვევაში, თუ მეორე ტურშიც ვერცერთმა კანდიდატმა ვერ დააგროვა არჩევისთვის ხმათა საკმარისი რაოდენობა, ხუთი დღის ვადაში ტარდება ხელახალი არჩევნები.

#### **მუხლი 26.**

1. სტუდენტური თვითმმართველობის პრეზიდენტი შეიძლება იყოს სტუდენტურ თვითმმართველობაში არჩეული დელეგატი, რომელიც არის საქართველოს მოქალაქე, ქმედუნარიანი, არ იკავებს უნივერსიტეტში რამე ადმინისტრაციულ თანამდებობას არ არის ნასამართლელი.

2. სტუდენტური თვითმმართველობის პრეზიდენტი არ შეძლება იყოს პირველი კურსის სტუდენტი.

#### **მუხლი 27.**

1. სტუდენტური თვითმმართველობის უფლებამოსილება იწყება მისი არჩევის მომენტიდან და წყდება ახალი პრეზიდენტის არჩევისთანავე.

2. ახალი პრეზიდენტის არჩევისთანავე წინა მოწვევის სტუდენტური თვითმმართველობის ყველა ორგანოსა და თანამდებობის პირს უწყდება უფლებამოსილება.

#### **მუხლი 28.**

1. სტუდენტური თვითმმართველობის პრეზიდენტის უფლებამოსილების ვადამდე ადრე შეწყვეტის საფუძველია:

ა) პირადი განცხადება;

ბ) სტუდენტის სტატუსის შეწყვეტა;

გ) მოქალაქეობის დაკარგვა;

დ) იმპიჩმენტის წესით თანამდებობიდან გადაყენება;

ე) სასამართლოს მიერ ქმედუუნაროდ, უზოუკვლოდ დაკარგულად ან გარდაცვლილად გამოცხადება;

ვ) გარდაცვალება.

2. პრეზიდენტის უფლებამოსილების ვადამდე ადრე შეწყვეტის შემთხვევაში, მის ადგილს იკავებს ვიცე-პრეზიდენტი.

## **მუხლი 29.**

საქართველოს კანონმდებლობის, უნივერსიტეტის წესდების ან/და ამ დებულების უხეში დარღვევის შემთხვევაში, სტუდენტური თვითმმართველობის დელეგატთა არანაკლებ 1/3-ს შეუძლია საერთო კრების დღის წესრიგში დააყენოს სტუდენტური თვითმმართველობის პრეზიდენტის იმპიჩმენტის საკითხი. პრეზიდენტი გადაყენებულად ჩაითვლება, თუ საკითხს მხარს დაუჭერს საერთო კრების შემადგენლობის არანაკლებ 3/4.

## **მუხლი 30.**

სტუდენტური თვითმმართველობის პრეზიდენტი:

ა) ხელმძღვანელობს სტუდენტურ თვითმმართველობას;

ბ) დებულებით გათვალისწინებულ შემთხვევებში იწვევს საერთო კრებას;

გ) უძღვება საერთო კრების სხდომებს;

დ) წარმოადგენს სტუდენტურ თვითმმართველობას უნივერსიტეტის ხელმძღვანელ ორგანოებსა და მესამე პირებთან ურთიერთობებში;

ე) სტუდენტური თვითმმართველობის სახელით ხელს აწერს ოფიციალურ ფინანსურ და იურიდიულ დოკუმენტებს;

ვ) ხელს აწერს საერთო კრების სამართლებრივ აქტებს;

- ზ) ნიშნავს სტუდენტური თვითმმართველობის არჩევნების თარიღს მოქმედი თვითმმართველობის უფლებამოსილების ვადის ამოწურვამდე არაუგვიანეს ერთი თვისა;
- თ) შეიმუშავებს სტუდენტური თვითმმართველობის ბიუჯეტის პროექტს;
- ი) განიხილავს პროექტებს და მათი დაფინანსების საკითს;
- კ) განიხილავს ცალკეულ სტუდენტთა წინადადებებს და მათი დაფინანსების საკითხს;
- ლ) კოორდინაციას უწევს სტუდენტური თვითმმართველობის ორგანოთა საქმიანობას;
- მ) საერთო კრებას დასამტკიცებლად წარუდგენს აღმასრულებელი პალატის მიერ შემუშავებულ სტუდენტური თვითმმართველობის ბიუჯეტს;
- ნ) ხელს აწერს გადაწყვეტილებას სტუდენტური თვითმმართველობის დელეგატისთვის უფლებამოსილების ვადამდე ადრე შეწყვეტის თაობაზე;
- ო) საერთო კრებას დასამტკიცებლად წარუდგენს ვიცე-პრეზიდენტის კანდიდატურას;
- პ) საერთო კრებას დასამტკიცებლად წარუდგენს სარევიზიო კომისიის თავჯდომარის კანდიდატურას;
- ჟ) უფლებამოსილია გადააყენოს ვიცე-პრეზიდენტი და პრეზიდენტის მიერ დანიშნული სხვა პირები დაკავებული თანამდებობებიდან;
- რ) განსაკუთრებულ შემთხვევებში, კონკრეტული საკითხების გადასაჭრელად ქმნის კომისიებს, რომლის წევრებსა და თავმჯდომარეებს ნიშნავს თავად;
- ს) თავის კომპეტენციას მიკუთვნებულ საკითხებთან დაკავშირებით გამოსცემს ბრძანებებს;
- ტ) ანიჭებს სტუდენტური თვითმმართველობის საპატიო წევრის წოდებას;
- უ) ახორციელებს ამ დებულებით გაუთვალისწინებელ სხვა უფლებამოსილებებს, რომლებიც არ ეწინააღმდეგება საქართველოს კანონმდებლობას ან/და სტუდენტური თვითმმართველობის დებულებას.

### **მუხლი 31.**

სტუდენტური თვითმმართველობის პრეზიდენტი ვალდებულია:

- ა) 6 თვეში ერთხელ საერთო კრებას წარუდგინოს ანგარიში სტუდენტური თვითმმართველობის ორგანოების საქმიანობის შესახებ;

ბ) დაიცვას სტუდენტური თვითმმართველობის დელეგატისთვის აუცილებელი მოთხოვნები.

### **მუხლი 32.**

1. უფლებამოსილების უკეთ განხორციელების ხელშეწყობის მიზნით სტუდენტური თვითმმართველობის პრეზიდენტს ჰყავს ვიცე-პრეზიდენტი.
2. ვიცე-პრეზიდენტი ხელს უწყობს სტუდენტური თვითმმართველობის პრეზიდენტის უფლებამოვალეობების განხორციელებას. პრეზიდენტის თანხმობის შემთხვევაში ვიცე-პრეზიდენტს უფლება აქვს სტუდენტური თვითმმართველობის სახელით ხელი მოაწეროს და გააფორმოს ოფიციალური ფინანსური და იურიდიული დოკუმენტები.
3. ასევე ვიცე-პრეზიდენტი ხელს უწყობს სტუდენტური თვითმმართველობის პრეზიდენტის უფლება-მოვალეობების განხორციელებას და უზრუნველყოფს სტუდენტური თვითმმართველობის ორგანოების კოორდინაციას.

## **თავი VII**

### **სტუდენტური თვითმმართველობის სამსახურები**

### **მუხლი 33**

სტუდენტური თვითმმართველობის სამსახური არის კონკრეტულ სფეროში დასახული მიზნების აღსრულებისთვის შექმნილი სტუდენტური თვითმმართველობის აღმასრულებელი ორგანო.

### **მუხლი 34.**

1. სამსახური შედგება სამსახურის უფროსის და დელეგატებისაგან, რომლებიც ახორციელებენ სამსახურის მართვას და რომელთაც სამსახურში სათათბირო ხმის უფლება გააჩნიათ, აგრეთვე, სხვა სტუდენტებისაგან, რომლებიც არ წარმოადგენენ სტუდენტური თვითმმართველობის დელეგატებს.
2. სამსახურის უფროსს და სამსახურში შემავალ დელეგატებს სტუდენტური თვითმმართველობის საბჭოს წარდგინებით ნიშნავს სტუდენტური თვითმმართველობის პრეზიდენტი.
3. სამსახური უფლებამოსილია, თუ მას ესწრება სრული შემადგენლობის ნახევარზე მეტი.

4. სამსახური გადაწყვეტილებებს იღებს დამსწრეთა შემადგენლობის უმრავლესობით.

### **მუხლი 35**

1. სტუდენტური თვითმმართველობის სამსახურის სხდომათა სიხშირეს განსაზღვრავს თავად სამსახური და მას უძღვება სამსახურის უფროსი.

2. სამსახურის რიგგარეშე სხდომის მოიწვევს:

ა) სამსახურის უფროსი თავისი ინიციატივით;

ბ) სტუდენტური თვითმმართველობის პრეზიდენტი ან მასთან შეთანხმებით ვიცე პრეზიდენტი.

### **მუხლი 36**

სტუდენტურ თვითმმართველობაში დასახული მიზნების აღსრულებისათვის შექმნილია შემდეგი სამსახურები:

ა) განათლების და მეცნიერების;

ბ) იურიდიული;

გ) კულტურისა და სპორტის;

### **მუხლი 37**

განათლებისა და მეცნიერების სამსახური გეგმავს და აწყობს დებატებს, დისკუსიებს, ტრენინგებს, ინტელექტუალურ თამაშებს, კონფერენციებს და სხვა საგანმანათლებლო-სამეცნიერო ღონისძიებებს.

### **მუხლი 38**

1. სტუდენტური თვითმმართველობის იურიდიული სამსახური ორგანიზებას უწევს სტუდენტური თვითმმართველობის ორგანოთა სამართლებრივი აქტების მომზადებას, მათ სისტემატიზაციასა და საჯაროობას, კონსულტაციას უწევს სტუდენტური თვითმმართველობის ორგანოებს სამართლებრივი აქტებისა და სხვა სახის დოკუმენტების მომზადებაში, სხვადასხვა სამართლებრივ საკითხების

გარკვევაში. თავის კომპეტენციას მიკუთვნებულ საკითხებთან დაკავშირებით, თანამშრომლობს უნივერსიტეტის ადმინისტრაციასთან.

2. სამსახური ასევე უზრუნველყოფს სტუდენტთა უფლებებისა და კანონიერი ინტერესების დაცვას, დარღვეული უფლებების აღდგენას, პერიოდულად ახდენს აკადემიური პერსონალის შემოწმებას, ახორციელებს სტუდენტთა უფლებებისა და კანონიერი ინტერესების დაცვისათვის სხვა აუცილებელ ღონისძიებებს.

3. სტუდენტური თვითმმართველობის სამსახურს აკომპლექტებს და მის უფროსს ნიშნავს სტუდენტური თვითმმართველობის საბჭოს წარდგინებით სტუდენტური თვითმმართველობის პრეზიდენტი.

### **მუხლი 39**

1. კულტურისა და სპორტის სამსახური გეგმავს და აწყობს თეატრალურ, კულტურულ, შემოქმედებით და კანონით ნებადართულ სხვა ღონისძიებებს, აგრეთვე შეხვედრებს საზოგადოებისათვის სასურველ პიროვნებებთან.

2. სამსახური აწყობს შეჯიბრებებს, ჩემპიონატებს სპორტის სხვადასხვა სახეობებში, თანამშრომლობს სპორტის დეპარტამენტთან აგრეთვე ცალკეულ სპორტის სახეობათა ფედერაციებთან და ახორციელებს კანონით ნებადართულ სხვა უფლებამოსილებებს.

## **თავი VIII**

### **სარევიზო კომისია**

#### **მუხლი 40**

1. თვითმმართველობის დებულების შესრულებისა და ფინანსური სახსრების თუ სხვა ქონების მიზნობრივად გამოყენებაზე კონტროლს ახორციელებს თვითმმართველობის სარევიზიო კომისია.

2. იგი ასევე ვალდებულია უზრუნველყოს სტუდენტური თვითმმართველობის საქმიანობის საჯაროობა.

3. სარევიზიო კომისია შედგება 4 წევრისაგან.

4. სარევიზიო კომისიაში წარმოდგენილია ყველა ფაკულტეტი თანაბრად;

5. სარევიზიო კომისია თავისი უფლებამოსილების ვადით არჩევიდან 10 დღის განმავლობაში საკუთარ წევრთაგან ირჩევს თავმჯდომარეს. სარევიზიო კომისია მუშაობს მის მიერ შემუშავებული დებულებით.

6. სარევიზიო კომისია წელიწადში ერთხელ მაინც აწყოფს საფინანსო-საბუღალტრო დოკუმენტების რევიზიას და ანგარიშს გაწეული სამუშაოს შესახებ წარუდგენს თვითმმართველობის საბჭოს.

## თავი IX

### გარდამავალი და დასკვნითი დებულებანი

#### მუხლი 41

1. წინამდებარე დებულება ძალაში შევიდეს სტუდენტური თვითმმართველობის პრეზიდენტის ან ვიცე-პრეზიდენტის მიერ ხელის მოწერისთანავე.
2. ამ დებულების მიღებით გაუქმდეს სტუდენტური თვითმმართველობის 2011 წლის 24 სექტემბრის დებულება.